

En memoria da sur Calist Monn Rueras/Glaruna

Conrad Berther Rueras

Ils 6 da settember 1997 ha il zenn grond da sogn Giachen a Rueras annunzia la mort da sur Catist Monn. Pils ins ei quella annunzia stada surpresa, per quels che vevan enconuschientscha da siu sesanflar denton strusch, pertgei el era bien e daditg malsauns. La sanadad veva sfurzau sur Calist avon miez onn da serender en casa da tgira.

Il defunct ei naschius ils 20 da settember 1922 a Rueras sco fegl vegl da Gion Antoni Monn e Sabina nata Venzin oriunda da Selva. Enta Rueras vegneva siu bab numnaus il fravi pign. Il motiv da quei num era bein che la mumma era morta cura che Gion Antoni veva 8 onns ed el ei lu vegnius tratgs si da siu aug Giachen Lurenz Caduff ch'era il fravi da Rueras da lezs onns. Aschia ha il bab da sur Calist empriu da fravi tier siu aug e luvrau tier quel tochen tier sia maridaglia.

Cura ch'ils geniturs han purtau siu empremnaschiu a Sedrun per annunziar quel allas instanzas e per schar battegiar, vevan ins nuota aunc fatg gronds patratgs pervia dil num dil niev-naschiu. Da lez onns haveva Sedrun in plevon ed in caplon, sto esser ch'ei existeva aunc negin manco da spirituels. Sin la damonda dil caplon co ins vegli dar num al pignet, ha il bab detg ch'els hagien buca fatg gronds plans sur da quei, denton cun quei che sur caplon



hagi num Calist savessien ins era dar num al pignet Calist. Ei fussi forsa pusseivel che quel vegnessi in di era augsegner.

Il Gion Antoni e la Sabina han giu ina gronda famiglia. Sper sur Calist han els aunc giu 2 buobs e 4 buobas. Aschia san ins mo s'imaginat tgei grevezia ei ha muntau per ils geniturs cura che siu fegl grond ha giavischau suenter las scolas realas da studegiar vinavon. Senza gl'agid dils fargliuns e cunzun da siu frar Flurin che stueva gidar ils geniturs dapertut, fuss ei strusch stau pusseivel da caschunar al Calist in studi da biabein 10 onns. Ed era finanzialmein ha ei bein duvräu

buns vischins e donaturs che han giu cor aviert pil giuven student.

Suenter haver giu fatg matura a Mustér ei il Calist sedecidius dad ira giu Cuera el seminari da spirituels. Ils 20 da fenadur 1947 ha el astgau festivar messa nuviala. Il giuven spiritual ha beinspert entschiet sia lavour pastorala sco provisur a Ruggell el Liechtenstein. Suenter mo miez onn eis el vegnius elegius plevon a Ruschein. Il giuven plevon ei denton vegnius malauns ed ha stuii serender el spital e suenter en ina casa da convalescenza. Sias staziuns per serestabilir ein stadas a Cuera ed Arosa. Puspei ina fuorma sauns, eis el staus 2 onns spiritual a Tavau el sanatori «Heiligkreuz». Igl onn 1952 ha igl uestg tarmess Sur Calist a Pigniu nua ch' el ei staus 9 onns e miez provisur. Suenter sia pastoraziun a Pigniu ei sur Calist puspei vegnius delegaus a Liechtenstein num nadamein sco caplon a Triesen nua ch'el ha pastorau 10 onns. Da 1971 tochen 1977 ei il defunct staus plevon a Danis/Tavanasa. Igl onn 1977 eis el vegnius elegius plevon da Sagogn, quei ei stau sia davosa staziun pastorala en Surselva. La sanadad ha mudergiau sur Calist aschi fetg ch'el ha la finala stuii serender ella Bassa. Dapi 1982 ei siu dacasa staus a Glaruna. Leu eis el segidaus cul plevon sco resignat entochen igl onn 1994.

Ils davos onns ha il defunct giu grondas difficultads cun la funcziun dil

cor, il trer flad mava vess. Plaun a plaun ein las forzas corporalas idas alla fin. L'entschatta settember ha il Segner liberau sur Calist dil pitir mundan e clamau siu fideivel survient tier el.

Sur Callist era in fervent veneratur da Nossadunna. En ses priedis ha el adina puspei fatg attents ils parochians dil grond agid da Maria per quel che roga e sefida dad ella. In sentiment tut apparti ha el era giu pils attempai, ellas casas da vegls era el adina beinvegni e respectaus. Occasionalmein ha il defunct era priu la plema e secret artechels el «Bündner Tagblatt», ella «Gasetta Romontscha» ed el «Pelegrin».

Ils 11 da settember ha il pievel da Tujetsch priu comiau da sur Calist. Ina gronda retscha da ses confrars, bia vischinas e vischins da Tujetsch e delegaziuns dallas pleivs nua che sur Calist ha operau, han accumpaignau il defunct dal sanctuari da sogn Vigeli giu sin santeri. Siu davos giavisch ei ius en vigur cun satrar el sco mintga sempel vischin da Rueras.

Sias restonzas terrestras rauussan ussa el tratsch benediu. Il crap-fossa cun ils numbs dils spirituels sil santeri sut Sogn Vigeli vegn ussa augmentaus cun il num d'in sempel e bien augsegner ch'ei buca pli denter nus. Lein tener sur Callist en buna memoria cun la speranza d'astgar seveser in di cun el en l'auter mund. Segner dai a Tiu survient il sogn rauus perpeten.